

Regional News Unit AIR Aizawl
Monday, July 08, 2024
Time - 7:30 -7:40Hrs
REGIONAL NEWS BULLETIN

HEADLINES (MORNING)

- **Bangladesh atanga raltlan lo lut mi 126, BSF hovin Bangladesh a an thawn kirte chu nizan khan Mizoram Police-te kuta hlan an ni.**
- **Champhai district Zokhawthar a Myanmar lam bungrua lo lut thin chu fur a nat avangin a lo thleng tlemin a man pawh a to hle.**
- **Congress hruaitu leh Lok Sabha Opposition Leader Rahul Gandhi chuan vawiinah Manipur a tlawh dawn.**
- **Prime Minister Narendra Modia chuan vawiinah Russia leh Austria tlawh turin a zinchhuak dawn**

<><><>

BANGLADESH REFUGEES

Bangladesh atanga raltlan lo lut mi 126, BSF hovin Bangladesh a an thawn kirte chu nizan khan Mizoram Police-te kuta hlan an ni.

Home Minister Pu K. Sapdanga hnen atanga Akashvani Aizawl thudawn danin raltlan 126-te hi ramri atangin Police-in an va hruai a. An chanchin kimchang an lakkhawm hnu-ah nizan dar 7 leh a chanve velah chuan zo felin hemi hnu-ah hian an awmna tur Chamdur ‘P’ lama hruai tura ruahman a ni. Pu K. Sapdanga chuan BSF-in Mizoram chhunga lo lut tawhte an ram lama an thawn kir leh chungchangah Chief Minister Pu Lalduhoma chuan Home Ministry a a thlen tur thu leh mawh a phurh tur thu a sawi a. Hemi hnu hian Inrinni khan Pu Lalduhoma hian Delhi-ah Prime Minister Narendra Modi hmu-in hemi chungchang hi a sawipui a. An sahimna zawnga Bangladesh atanga raltlan lo lutte hi Bawm hnam ‘Zofate’ an nih avangin a thawn kir theih loh thu a hrih a ni, a ti a. Raltlante hi BSF hovin ram pawna an thawnkir luih an nih avangin an lirthei bawh hmanga hruaikir an nih thu Home Minister chuan a sawi a ni.

Home Minister-in a sawi dan chuan Bawm raltlante hi BSF hian nawr kir leh tumin Inrinni khan ramri bul Kamtuli khua-ah an phurh kir hman a. Home Ministry atanga thu an hmuh tak avangin BSF hian Kamtuli atangin Chhippui khuaah nimin tlai dar 4 khan mi 126-te hi phurh thlen an ni tawh a. Chhippui khuaah tihfel ngaite an tihfel zawh hunah khua-in a bumro loh chuan Chamdur ‘P’ an panpui ang a, state police kutah hlan tura ruahman a ni.

Raltlante lo dawngsawng tur hian Lawngtlai bawrhsap pisa atangin Civil officer te leh SDPO-te’n buhfai kengin Chamdur an thleng tawh a. Chawngte SDPO hoin Mizoram Police ten an veng bawh. Bawm zirlai hruaitute leh Tuichawng Group YMA hruaitute pawhin raltlante hi an tawiawm a, Mizoram police kuta an awm hunah an chenna tur an ngaihtuahpui nghal an ni dawn niin Pu K. Sapdanga chuan a sawi a ni .

Kar kalta Zirtawpni zan khan chhungkaw 32 ami mi 93 chu Chittagong Hill Tracts atangin Lawngtlai district-a Damdep-2 khua-ah an sahimna zawngin an lo lut a. Heta lo lutte hi mipa 43, hmeichhia 24 leh naupang 26 an ni a. An zingah hian thla 7 mi hmeichhe nausen leh kum khata upa hmeichhe nausen leh mipa naupang kum 3 mite an tel a, tar chak lo leh damlo an awm nual bawk ni a thudawn a ni. Raltlante hi Chittagong Hill Tracts a Happy Hills leh Zulvarawng amite deuh vek an ni a, Bethel, Bethlehem, Arthah, New Eden leh Gethsemani khua amite an awm ve bawk.

Raltlan mi 93 te hi Bangladesh ram chhung ngaw hnuai a awm mek, a hma lama BSF-te thawn kir ni a hriat mi 33-te'n an rawn fin leh tak avangin an vaiin 126 an tling ta a. Hemi hma June thla chhovah pawh khan BSF hian Bangladesh raltlan tam tham tak, Lawngtlai district a lo lut tawhte an lo hnar kir leh tawh a ni.

<><><>

DRUG SEIZURE

Mizoram Police leh Excise & Narcotics department-in kumin kum chanve chhung khan heroin kg 80 leh gram 8 an man.

Department pahnih hotute hnen atanga thudawn danin kum chanve chhung hian Police-in heroin kg. 46 leh gram 348 an man a, Excise and Narcotics chuan kg 30 leh gram 660 an man a ni. Hemi chhung vek hian Police-in methamphetamine kg 89 leh gram 445 an man bakah crystal meth kg 13 leh gram 49 an man bawk a. Methamphetamine mum an man hi a vaiin cheng vaibelchhe 11 leh nuai 63 hu a chhut a ni a. Crystal meth hi a mum ni lovin tengkhang an chi a ni a, a man a to hle a. kg 13 chuang hret hi cheng vaibelchhe 40 leh nuai 47 a chhut a ni. Excise hian methamphetamine kg 112 leh gram 528 an man thung. Ganja hi Police-in kg 112 leh gram 94 an man a, Excise-in kg 418 leh gram 462 an man bawk. Police department-in tun thla ruk kalta chhunga an ruihhlo man zawng zawng hi cheng vaibelchhe 66 leh nuai 96 hu niin an chhut a. Ruihhlo kaihhnawihah mi 270 an man tawh a. Narcotic Drugs and Psychotropic Substances Act, 1985 hmangin thubuai 199 an ziak lut tawh bawk a ni.

Hetih lai hian January thla atanga June ni 25 thleng khan Mizoramah ruihhlo vangin mi 42 an thi tawh a, an zinga a mi 7 hi hmeichhia an ni a. Ruihhlo vanga thi zinga 31 hi heroin vanga thi an ni a, mi 11 chu heroin leh damdawi dang khawih kawp vanga thi an ni bawk a ni. Excise and Narcotics department chhinchhiah danin kum 1984-a heroin avanga thi 1 an chhinchhiah tan atanga kumin June ni 25 thleng khan ruihhlo vangin mi 1,854 an thi tawh a, an zinga mi 1,630 hi mipa ni-in hmeichhia 224 an thi tawh bawk. Thi zawng zawng zinga 1,161 hi spasmoproxyvon leh parvon spa vanga thi an ni a, kum 2017 atang erawh chuan he'ng na chhawkna hman sual vanga thi hi an awm leh tawh lo thung a. Heroin vanga thi hi 264 an ni a, ruihhlo tihkawp vanga nunna chan hi mi 429 an awm tawh bawk a ni.

<><><>

MERCHANDISE

Tahan atanga Falam kaltlanga Champhai district Zokhawthar a Myanmar lam bungrua lo lut thin chu fur a nat avangin a lo thleng tlemin a man pawh a to hle.

Zokhawthar khawtlang hruaitute hnen atanga thu dawn danin June ni 8 a Myanmar sipai hovin bomb hmanga Run lui chung a lei dawh an tih chhiat avangin Tahan atanga Zokhawthar rawn panna kawng hnai ber Tahan-Tedim-Khawmawi kawng chu lirthei eng chi mah a kal thei tawh lova. A kawng kual leh hla zawk, Tahan-Falam-Rihkhawdar atang hian lo lut ve bawk mah se a kawng a thui avangin a kal rei a, thil man pawh a to zawk a. He kawngpui hi tun hnai ruahsur nasa-ah kal harsa khawpin a chhe leh a. Helai bial vel awp mektu Chin National Organisation (CNO) leh ralthuam keng pawl Chin National Defence Force (CNSDF)-te chuan July thla bul atang khan lirthei len zawng a zirin chhiah an khawn a. An chhiah khawn hi kawngpui siamthatna atana hman tur niin an sawi. Tlawngai pawl, kohhran leh Myanmar sipai sorkar do pawlthe erawh chu chhiah hi an awl niin CNO thupuangtu Salai Tin Mi chuan a sawi a ni.

Hetih lai hian Aizawl-ah pawh khilam bungrua a tam lo hle a, a man pawh a sang chak viau ni a thu dawn a ni.

<><><>

REV. LALCHUNGNUNGA

Thuhritlu lar leh Mission For Christ hmuchhuaktu Rev. Dr. Lalchungnunga chu vawiin hian vui a ni ang. Rev Dr Lalchungnunga hu kum 92 mi a ni.

Vawiin chhun dar 12-ah a rawngbawlina hmunpui Mission For Christ Headquarter Hermon vengah vui a ni ang. Rev. Dr. Lalchungnunga hi kum 1932 a piang a ni a, unau 11 dam zinga a a upat dan indawta 7-na a ni a. Unau mipa 6 leh hmeichhia 5 an ni.

<><><>

BIRTHS AND DEATHS

Economics & Statistics Dept. hnuai Civil Registration System Centre in a tarlan danin thla hlui June thla chhung khan Mizorama nau piang zat chu 1,166 an ni a, heng zinga nau piang 604 chu mipa niin hmeichhia 562 an ni.

Thla kalta chhung vek khan Mizoramah mitthi 476 awmin he'ng zinga 298 chu mipa niin hmeichhia 178 an ni. Kum 2022 chhung khan Aizawl District ah mipa piang zat chu 4,817 a ni a, hmeichhia 4,790 an piang thung a. Kum 2023 chhungin mipa piang zat chu 4,788 a ni a, hmeichhia 4,540 an piang a. Kum 2022 leh 2023 a mipa piang kiamna zat chu 29 a ni a, hmeichhia piang kiamna zat chu 250 a ni. A pumpuia khaikhin chuan naupiang kiamna zat chu 279 a ni. Kum 2022 khan mipa thi zat hi 2,661, hmeichhia 1,361 an ni a, kum 2023-ah mipa thi zat chu 2,943 a ni a, hmeichhia 1,295 an thi thung a. Kumin January atanga April thla thleng khan mipa 1475 an piang a, hmeichhia 1406 an piang thung a. Kumin January atanga April thla chhung vek khan mipa thi zat hi 842 a ni a, hmeichhe thi zat hi 436 a ni a, a vaiin mitthi zat hi 1,278 an ni.

Tun dinhmunah Economics & Statistics Department hnuai hian Branch leh Unit 8 a awm a. Chung zinga pakhat chu Civil Registration System Centre - piang leh thi bakah population chungchang chhinchhiahna a ni.

<><><>

PM

Prime Minister Narendra Modia chuan vawiinah Russia leh Austria tlawh turin a zinchhuak dawn a. Moscow ah India leh Russia Annual Summit vawi 22 na a hmang ang a. He hunah hian Russia President Vladimir Putin nen ram pahnih inlaichinna hrang hrang ralthuam, sumdawonna, investment, energy, zirna, culture leh mipuite inzawmna te an sawidun ang.

Prime Minister Narendra Modia chuan Austria a tlawh dawn bawk a, kum 40 hnua India PM zinga Austria tlawh leh hmasa ber a ni ang.

Austria Chancellor Karl Nehammer chuan Prime Minister Narendra Modia'n Vienna a lo thleng tur chu an nghakhllel hle tih social media ah a sawi a. An tan hun chhinchhiahtlak tak anih thu sawiin kum 40 hnua India PM in an tlawh leh vawi khatna tur a ni a ti a. Hei bakah hian India leh Austria te thawhdunna kum 75 tlin champha a ni dawn tih a sawi bawk a. Hun lo kal turah ram pahnihte inkarah inlaichinna tha a awm belh zel a beisei tih sawiin thawhdunna tha tak tak nei tura an inbiak ngei a beisei a ti bawk.

Prime Minister Modia pawhin Austria Chancellor hi lawmthu hrilhin Austria a tlawh thei tur chu lawmawm a tih thu a sawi a. Ram pahnih inkar ti nghet zual turin inbiakna hun tha tak an hman a beisei a ti a. Mipui rorelna democracy, zalenna leh dan hnuaia rorelna chu an inngahna anih avangin an inlaichinna pawh a hma aia tha zawkin an siam a beisei thu a sawi a ni.

<><><>

RAHUL GANDHI

Congress hruaitu leh Lok Sabha Opposition Leader Rahul Gandhi chuan vawiinah Manipur a tlawh dawn. A cham chhungin tualchhung buaina avanga harsatna tawk chhungkua chhawmdawlina camp hrang hranga enkawlte a tlawh dawn a. Manipur Governor Anusuiya Uikey a tlawh bawk ang. Pu gandhia'n Manipur a tlawh dawn avang hian venhimna pawh khauh taka kalpui a ni.

<><><>